

■ COLUMNA

Cac – tge merda!

DA MARIA CADRUVI

Igl è ina veglia vardad che l'entir sa manifestescha en il detagl, ch'il grond sa mussa gia en il pitschen. Quai è uschia en nos gens e quai n'è betg auter en noss cumportament. Jau vuless prender sco exempel ils possessurs e las possessuras da chauns. Lur cumportament en connex cun il cac da lur chaun mussa tge ritgezza da detagls ch'i dat.

Idat quels possessurs ch'han adina in satg da plastic cun els cura ch'els van a spass cun lur chaun. Sche Fido ubain Tara fan lur basegns prendan ils patruns si la fatschenta cun il satg e deponan quel en il proxim chanaster da rument. I dat qua in tric, co far quai senza tschufagnar ils mauns: Ins sanestra il satg e va cun ses maun lien. Aschia daventa il satg in guant che lascha tschiffar il cac si da plaun senza ch'il maun vegnia directament en contact cun quai ch'ins na vuless avair da far nagut. Inagiada che quai è fatg èsi simplamain puspè da volver il satg sin la vart dretga, prender il maun or dal plastic, far in nuv en il satg e purtar la chaussa sco in requisit personal, saja quai enta maun u en x-ina tastga enfin tar il proxim chanaster da rument.



Idat quels possessurs che fan quai tut exact sco descrit – sulettamain cun la varianta ch'els deponan il satg da plastic immediat sper via giu per terra, ubain sin il proxim banc ch'envida ils viandants a far in paus, ubain sper in crap, ubain sut ina chaglia. Sch'ils satgs da plastic èn cotschens sche dat quai in cler cuncontrast en la cuntrada, cun il verd da la primavaira e stad, cun il brin da l'atun e cun l'alv da l'enviern.

Lura datti quels possessurs che laschan il cac da lur chaun gist là nua ch'el croda. Amez la via, amez il vitg, amez il trottuar, amez la prada, amez la piazza da giugar, amez la loipa. Sa chapescha ch'i dat era quels possessurs ch'han uschiglio adina in satg da plastic cun els, sulettamein oz betg. Jau conusch ina dunna che n'ha

sezza betg in chaun. Ma mintgatant, cura che ses vischins èn davent, va ella a spass cun lur chaun. Ella n'ha betg sulettamain in satg da plastic cun ella, mabain era anc ina pitschna palutta da plastic sco quai ch'ils uffants han en la sablunera. Cun questa palutta prenda ella si il cac dal plaun e metta el en il satg ch'ella depona lura en il proxim chanaster da rument.

In chapitel per sazez è il cac dals chauns en las pradas. Dumandai ils purs! Els san che las vatgas ed ils vadels han pli gugent il fain senza cac da chauns. Ma ils chauns dals purs astgan savens far lur fatschenta nua ch'els vulan. Igl è halt ina differenza tranter l'agen e l'ester – perfin tar il cac.

En il pitschen sa mussa il grond. Il detagl è ina manifestaziun da l'entir. Naturalmain betg da l'entir entir, mabain sulettamain dad ina part da l'entir. Perquai fissi era sbaglià da giudigar l'entir character dals possessurs da chauns sulettamein tenor lur cumportament cun il cac da lur chauns. Forsa èsi schizunt sbaglià da duvrar il spazi d'ina columna per da questas merdas.

maria.cadruvi@spin.ch